



Eich cyf P-06-1486
Ein cyf VH/10148/24

Carolyn Thomas AS
Cadeirydd y Pwyllgor Deisebau

03 Ionawr 2025

Annwyl Carolyn,

Diolch am eich llythyr, dyddiedig 9 Rhagfyr, ynghylch *'Deiseb P-06-1486 Rhoi statws ffioedd cartref i fyfyrwyr o Hong Kong sydd â fisa Dinasyddion Prydeinig (Tramor) ar ôl tair blynedd o breswyllo'*, lle rydych yn mynegi pryderon am yr amserlen ar gyfer adolygu cymhwysedd unigolion o Hong Kong sydd â fisa Dinasyddion Prydeinig (Tramor).

Mae datblygu polisi a deddfwriaeth ar gymorth i fyfyrwyr a diogelu ffioedd yn gymhleth, ac mae amseru yn bwysig. Mae Llywodraeth Cymru wedi ymrwymo i adolygu sefyllfa'r deiliaid fisa hyn cyn blwyddyn academiaidd 2026/27. Rwy'n disgwyl i'r adolygiad hwn ddod i ben yn hanner cyntaf 2025 cyn i ddeddfwriaeth gael ei pharatoi ar gyfer y flwyddyn academiaidd wedyn.

Pan fydd Llywodraeth Cymru yn diogelu ffioedd unrhyw grŵp penodol, rhaid gwneud newidiadau mewn da bryd. Ni allwn ddisgwyl yn rhesymol i sefydliadau addysg uwch yng Nghymru fabwysiadu polisi diwygiedig ar godi ffioedd yn hwyr yn eu cylch derbyn a'u paratoadau ar gyfer blwyddyn academiaidd newydd.

Mae'r un peth yn wir pan fydd Llywodraeth Cymru yn datgan bod grŵp penodol yn gymwys i gael cymorth i fyfyrwyr. Mae'r Cwmni Benthyciadau i Fyfyrwyr yn lansio ei wasanaeth cyllid myfyrwyr sawl mis cyn y flwyddyn academiaidd i sicrhau bod gan fyfyrwyr ddigon o amser i wneud cais am gymorth ac i ddeall eu sefyllfa ariannol, ac i alluogi'r degau o filoedd o geisiadau i gael eu prosesu. Er mwyn i hyn ddigwydd, mae'n rhaid i Lywodraeth Cymru wneud unrhyw ddeddfwriaeth ddiwygio ymhell ymlaen llaw. Mae'r broses honno bellach yn nesáu at ei therfyn cyn blwyddyn academiaidd 2025/26.

Mae adolygu meini prawf cymhwysedd yn gymhleth. Mae diogelu ffioedd a rhoi cymorth i fyfyrwyr yn benderfyniadau a wneir yn ôl disgresiwn, a rhaid i Lywodraeth Cymru sicrhau bod hyn yn digwydd ar sail tystiolaeth a chyingor a ystyriwyd yn ofalus. Mae Llywodraeth Cymru yn ymwybodol bob amser o bwysigrwydd mynediad at addysg uwch a'i botensial i newid bywyd rhywun.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Vikki.Howells@llyw.cymru
Correspondence.Vikki.Howells@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Y rhai sy'n gymwys i gael cymorth i fyfyrwyr ac i'w ffioedd dysgu gael eu diogelu yw'r rhai sydd â statws preswlydd sefydlog yn y DU ac sydd, ar y cyfan, yn preswyllo yng Nghymru fel arfer. Mae'n rhaid iddynt fod wedi preswyllo yng Nghymru fel arfer am dair blynedd cyn y byddant yn gymwys. Bydd deiliaid fisa Dinasyddion Prydeinig (Tramor) yn gymwys, felly, cyn gynted ag y byddant wedi cael statws preswlydd sefydlog, a'u bod wedi preswyllo yng Nghymru fel arfer am dair blynedd, yn yr un ffordd â phawb arall sy'n preswyllo yng Nghymru fel arfer.


Mae yna rai eithriadau i'r rheol ynghylch statws preswlydd sefydlog, a gaiff eu gweithredu weithiau yn achos y rhai sy'n destun math o ddiogelwch dyngarol gan Lywodraeth y DU. Gwneir eithriadau i'r polisi sy'n gofyn am dair blynedd o breswyllo arferol hefyd yn achos rhai grwpiau - unwaith eto, i'r rhai sy'n destun math o ddiogelwch dyngarol gan Lywodraeth y DU yn aml. Mae Llywodraeth Cymru ar ddeall nad yw llwybr fisa Dinasyddion Prydeinig (Tramor) yn un o'r mathau hyn o ddiogelwch dyngarol.

Fodd bynnag, i gydnabod sefyllfa unigryw'r rhai sydd â'r fisa hon, statws Cymru fel Cenedl Noddfa, a chymhlethdod polisi mewnfudo, mae Llywodraeth Cymru yn barod, fel y nodwyd, i adolygu'r polisi.

Nid oes gan Lywodraeth Cymru ystadegau ar statws mewnfudo'r rhai sy'n preswyllo yng Nghymru fel arfer. Rwyf ar ddeall, o edrych ar y cwestiwn '*How many people come to the UK via safe and legal (humanitarian) routes?*' (<https://www.gov.uk/government/statistics/immigration-system-statistics-year-ending-september-2024/how-many-people-come-to-the-uk-via-safe-and-legal-humanitarian-routes>) fod 174,307 o fisâu wedi'u rhoi i bobl y tu allan i'r DU, a 41,305 o fisâu wedi'u hymestyn i bobl o fewn y DU, rhwng cyflwyno'r fisa ar 31 Ionawr 2021 a diwedd Medi 2024. Nid oes ystadegau swyddogol ar ddeiliaid y fisa hon yng Nghymru.

Os bydd unigolion yn dymuno trafod y mater ymhellach, gallant ysgrifennu ataf drwy e-bost yn Gohebiaeth.Vikki.Howells@llyw.cymru neu drwy'r post: Vikki Howells AS, y Gweinidog Addysg Bellach ac Uwch, Llywodraeth Cymru, 5ed Llawr, Tŷ Hywel, Bae Caerdydd, CF99 1SN.

Yn gywir,



Vikki Howells AS/MS

Y Gweinidog Addysg Bellach ac Uwch